

ساقية الدحلاب

مرفقات سعيد

جلس يستظل بنخلته التي اعتاد شرب الشاي تحتها مردداً المواويل الشعبية القديمة تحيطه الخضرة وجمال الطبيعة وأولاده من حوله يلعبون، وعلى بعد أمتار قليلة سمع صوتاً ينادي بلهجة بحراوية:

- يا حاج محمد يا حاج محمد.

محمد:

- أيوه مين بينادي اتفضلوا.....اتفضلوا يا بهوات.

حيث لمح شخصين يرتديان البذل الغالية يترجلان من سيارة فاخرة !
ناداه أحدهما قائلاً:

- إذا سمحت تعالى هنا عايزينك.

هرول الرجل باتجاه السيارة متمتماً بارتباك وخوف شديدين:

- يا خراب بيتك يا محمديا خراب بيتك؛ دول شرطة الكهربي ولا بتوع الميه! لأ دول بتوع الجيش وقعة مربربة حيوجدوني بعد الثلاثين، بس دي مش عربية شرطة ولا ده لبسهم؟! ااااا دول بتوع المخابرات يا نهار مطين وأنا امبارح عمال أسب في الرئيس على القهوة، اتخرب بيتك يا ...!

حسم أمره ووصل لتلك السيارة المقيمة؛ وبصوت مرتعش متقطع:

- أيوه يا بيه خير؟!

- أنا عملت إيه يا باشا؟!

إمتدت يد أحد الأفندية نحوه ليمسك بمعصمه ويجذبه نحو شباك السيارة هادرًا بصوت خشن:
- كلم الباشا .

بدأ زجاج السيارة بالنزول ليظهر خلفه وسيم بعمر الخمسين مشبهًا الوزراء بهيأته مرتديًا نظارة سوداء تخفي نصف وجهه كما في الأفلام .

الرجل:
- أيوه يابيه أوامرني خدامك .

البية:
- متخافش إحنا محتاجينك في خدمة صغيرة .

الرجل بتساؤل:
- أنتم يا باشا محتاجيني أنا في خدمة؟! خبر إيه يا ولاد الأيام بتمشي بضهرها؛ ولا القلط كلت عيالها!! سيبوني يا بيه أرمح أربي عيالي .

البية:
- قولنالك ماتخافش إحنا عايزينك في مهمة وحتاكل من وراها الشهد .

الرجل باستسلام:
- نعم يا بيه خدامك قول .

تعرف فين مكان ساقية «الدحلاب»؟!

ردّد (باستغراب وشرود):

- ساقية «الدحلاب!» لا يا باشا في عندينا أربع سواقي مفيش فيهم الاسم ده وعلي العموم يا باشا اديني فرصة أدور واسأل بس الأول هي في بلدنا ولا البلد اللي جنبنا؟!

- لأ بلدكم ولو جمعتها حدفعلك اللي إنت عايزه. الرجل: خلاص يا بيه إديني يومين ويوم الجمعة تعالوا أكون جمعتها.

- تمام خد دول وخذ الكارت بتاعي ولو جمعتها قبل اليومين كلمني .

- ربنا يخليك يا بيه؛ ربنا يبارك فيك ويطول في عمرك؛ من يد مانعدها يا باشا.

ثم ركبوا جميعهم السيارة ورحلوا وعاد الرجل لكوب الشاي الذي فقد نكهته مثله وأولاده الشاخصة أعينهم والدمع يتأرجح فيهم؛ جميعهم صامتون فقط الأعين تحمل كمًا من الأسئلة التي تحتاج كراسة إجابة !

وإذا بصباح تناديهـم:

- يا محمد، يا خالد، يا شهد، جبت الوكل يلا تلاقيكم حتموتوا من الجوع !

يلتفتون جميعهم ليروها تحمل صينية الطعام فوق رأسها، بوجهها القمري وإبتسامة رضا وتفاؤل، وب نظرة واحدة لوجه زوجها عرفت أن هناك أمراً قد حدث.

صباح:

- مالك وشك مصفر إنت عيان؟! وإيه الكيس اللي في إيدك ده، مالكم؟ ما تردوا؟!

جلس الرجل وعقله يضرب أخماساً في أسداس!! ثم لوح بيده لها فراحت إليه مسرعة .

الزوجة:

- خير!

الزوج:

- تعالي عايزك في كلمتين .

اصطحبها وجلسا سويا على القنايه، وبكل لهفة وانفعال:

- بقولك إيه يابت الناس إسمعيني زين، إحنا طاقة القدر اتفتحت لنا
وحنكون أصحاب أطيان وعماير، وحجبلك الكردان واللبة والحجل؛
وحنروح أحلى رحلة حوديكي الأقصر، حدلعك بس قوليلي الأول:
تعرفي مكان «ساقية الدحلاب»!!

- ربنا يخليك ليا ياجوزي يا أبو عيالي يا سندي ياغالي روح ربنا يطول
في عمرك يا سبعي .

وإذا بالزوج ينهرها:

- خلاص يابوي خلاص قوليلي الأول بس فين ساقية الدحلاب؟! أحب
على راسك وراس خالاتك وعماتك وكل عيلتك إلحقيني، تعرفيها؟!
أيوه عرفاها .

- الله أكبر أبوسك ولا أشيلك ولا أعمل إيه بس أحب فوق راسك يا وش
السعد يا مرتي وأم عيالي؛ طب فين دي أصلي ما أعرفهاش؟

صباح حاصلة على ليسانس آداب لغة عربية، ارتضت بالزواج من محمد
الأمي وأتقنت لهجته وتطبعت بطباعه لأنه ابن عمها رضوخاً لعاداتهم؛ لذلك
عندما رأت الكيس الأسود، ووجه زوجها الشاحب وتساؤلاته حول هذه
الساقية التي دفن سرها مع والدها .

أخذت تربط الخيوط معًا وتوصلت لنتيجة أن هؤلاء الأفندية قد عرفوا من مصدر ما سر تلك الساقية الذي يجهله زوجها.

الزوجة:

- هو الكيس ده فيه إيه؟!!

الزوج:

- فيه خمسين باكو يا وش السعد ح نقب على وش الدنيا .

- أخذتهم مقابل إيه يا محمد؟!

- ولا حاجة كل الحكاية أني أوريهم ساقية الدحلاب

- وعرفت ليه هم عايزين ساقية الدحلاب دي؟

- وأنا مالي يا صباح أنا أقبض وهم حرين إياكش يردموها أنا مالي

أوريهاهم وآخد فلوسي! فين بقى قوليلي عشان أكلهم ويجبولي

الفلوس الكتيرة ونعيش إحنا وعيالنا اللي طول عمرهم محرومين من

كل حاجه زينه وإتعذبوا معانا.

- إنت مخك ناشف بقولك ما ينفعش الناس دي تعرف الساقية، دا سر قديم

واندفن وصاحبه محذرنى من إني أحكيه!

- بقولك إيه علي الطلاق لو ما قلتي ما إنت باقية علي ذمتي تاني سامعه.

استشعرت صباح أن بواذر العواقب من إفشاء السر تحلق في الأفق، لكن

لم يبق لها حرية الاختيار !

الزوجة:

- بقولك يا محمد يلا نروح وحكيك سر الساقية في البيت .

وعندما وصلوا منزلهم الريفي البسيط المبني بالطوب اللبن والمغطى
بالبوص، كان الرجل قد نفذ صبره وأخذ يتعجلها لتبوح له بالسِر.

xxxx

بدأت تسرد السِر قائلة....

قبل وفاة والدي بشهر وحين اشتد عليه المرض أجلسني بجواره وقال:

- حاسس إنني أجلي قرب وعازي أقولك سر، إنت عارفة عمك خلف مات
كيف؟!

قلت:

- أيوه..... أيوه يابا، نهشته حية عند النخلة اللي في الحوش!

فرد الأب:

- لا يا بتتي أنا اللي قلت كدا ساعتها.

ردت عليه:

- إيه اللي حصله يابا؟!

قالي:

- يا بتتي في ساقيه اسمها ساقية الدحلاب، حصل جفاف زمان ونزلنا أنا
وعمك ننصفها عشان تزيد الميه فيها، عمك وهو نازل بيحط رجله في
حيط الساقية، القالب رمح لجوه، قام بإيده حاول يشوف الفتحة رايحه
لفين لكن الفتحة كانت غويطة!

عمك نده علي هات الطوريه وانزلي، اتخضيت، وبدون تردد أخذت
الطوريه ونزلت، فضل عمك يخبط في حيط الساقية لما الفتحة بقت تدخل

واحد قعد عمك يشخط في الكبريت عشان نشوف حاجه مشفناش وطلعنا،
لكن اتفقنا بعدها نجيب كلوب (مصباح) ونعرف الفتحة دي مودية فين وفيها
ايه .

وفعلا بالليل روحنا وواحد ورا الثاني نزلنا في الفتحة لقينا سلالم
وحيطان عليها مساخيط ورسومات تعاين وديابه وصورة لأسد براس تعبان،
المهم بعد مسافة وصلنا لأوضه لقيناها مليانه عرايس بس غالييتهم حجر
مفيش غير زلعه فيها شوية عملة ذهب، وفي كتاب جلد وعصايا علي شكل
تعبان وتابوت علي شكل راجل مكتف إيده وكأنه حيتكلم !

اتفقنا أنا وعمك إن محدش يعرف السر ده غيرنا وفعلا قدرنا نحافظ عليه
طول عشر سنين كل ما نتعذر نجيب كام واحدة من الذهب ونبيعهم، لكن مرة
أنا كنت مسافر عمك أخذ مرته معاه ونزل يجيب الذهب طلع لقها مرميه علي
الأرض ورجلها بتنزف، افكر الورق الجلد اللي تحت نزل جاب ورقة ولف
رجلها بيها وأخذها وروح لكن قبل ما يوصل البيت كانت ماتت ساعتها لما
سألوه الناس، قالهم حية نهشتها ولما أنا رجعت حكالي اتلخبطت!! لكن
نسبنا مع الأيام، ولفت السنين والجوع زاد يا بتي افكرنا أنا وعمك ساعتها
نرجع ننزل تاني ونجيب آخر حتت من الذهب لكن أنا خفت علي عمك وقلتله
مش حتنزل أنت، أنا اللي حنزل وفعلا نزلت أنا لكن حسيت بوحشه وأنت
عارفاني الخوف ما يعرف لقلبي طريق لكن خفت وحسيت الصور بتتحرك
وأصوات صريخ وحد بيقولي حتندم حتندم! المهم بقيت زي المسيح كلي
عرق والجلابية مبلولة طلعت علي آخر نفس !

أبص ألاقى عمك مرمي علي الأرض ورجله بتنزف دم، قطعت الجلالية
وربطت رجله وفي البيت بشوفه لقيته مات.

لما سألتني الناس قلت الحية اللي في النخلة نهشته وهو نايم، بعدها روجت
لشيخ وحكيتله قالي دا الحارس بتاع المكان ومن ساعتها أنا غطيت الساقيه
ومعدتش أخلي حد يروح لها .

يابتيًا الساقيه موتت أخويا ومرته فيها جن واعر قوي متحكيش لحد
ومترو حيش عندها !

وأنا من ساعتها مش راضيه أقول لك خايفه عليك وعلى عيالي.

xxxx

وقف الزوج وعيناه يتطاير منها الشرر :

- كل ده تعرفيه ومعيشانا في الفقر طب أقولك إيه بس ربنا يسامحك!
طيب آديني عرفت السرفين بقي المكان يا شملولة؟!

الزوجة:

- بعد اللي قلته لسه برضك عايز تمشي في السكة دي؟!

الزوج:

- عليا الطلاق لو ماقولتي لتكوني خلصانه من ذمتي .

راحت الزوجة تذرِف الدمع وتدقق النظر بمحمد الزوج الطيب الودود،
الذي لم يعتد يوماً أن ينهرها أو يرفع صوته عليها تحول فجأة عبداً للمال
وكأن أحداً غيره يتحدث !

وبصوت يملأه الشجن ونبرة كأنها تودع الحياة قالت الزوجة:

- عارف البير اللي مغطاياه في الحوش بتاعنا؟!

- أيوه ماله؟!

الزوجة:

- هو ده ساقية الدحلاب.

هب من مكانه فزعاً والشرر يتطاير من عينيه:

- كيف يعني؟ وفي بيتي كمان كيف؟

ظل يهذي ويدور حول البئر القديم ويتمتم بكلمات غير مفهومة وبسرعة نزع جلبابه وأزاح الستار عن البئر وهم بالنزول فيه لم يمنعه عن ذلك توسلات زوجته ولا صراخ أولاده، وقبل أن يفكروا في منعه كان داخل الساقية المهجورة فتجمدوا مكانهم خشية أن يفتضح السر للجميع.

تهليله أعادهم للحياة مرة أخرى وأخرجها من شرودها -فقد ظلت ترتجف وتدعو أن يخرج زوجها من البئر سالماً - فقامت مسرعة تتعثر في جلبابها .
تردد كلمات الحمد وقبل أن تصل إليه رآته يسقط أمامها مغشياً عليه وقدمه تنزف دماً .

رحل الزوج تاركاً زوجته تواجه المشكلات وحدها ومصير مجهول ينتظرها تراحمات الأفكار في رأسها وتوالت المشاهد أمام عينيها زوجها، الساقية، الأفندية، الآثار، صوت والدها يحذرها:

"الساقية يا بتي 'الموت يا بتي!'"

صباح وغفاريت الإنس والجن

عادت مخمرة بغبار المقابر بعد أن أودعت زوجها مثواه الأخير، مودعة ذكرياتها وأمنياتها معه، مقبلة على حرب لا هواة فيها ولا تراجع عنها .

ثلاثة أيام هي مراسم العزاء الأولى وتبدأ في تنفيذ خطتها هكذا حدثت

صباح نفسها وهي وحيدة حزينة في غرفتها أول ليلة بعد رحيل زوجها.

صبيحة اليوم الرابع لم تنتظر صباح حتى تطلع الشمس فقد جافاها النوم ولم تستطع صبراً فتسللت فجرًا وقد قررت مقابلة جارتها العجوز خديجة؛ أخذت تطرق الباب بلهفة وحذر ثم رفعت صوتها بالنداء :

- خالة خديجة أنا صباح يا خالة إفتحي يا خالة

فتحت الخالة الباب مندهشةً من خروجها في هذه الظروف وذلك التوقيت!!

قصت عليها كل شيء بكل صراحة واختصار :

- اسمعي يا خالة من غير لف ولا دوران أنا أبويا حكالي علي كل حاجة وقال

لى لو سر الساقية اتفضح روعي لخالتك خديجة وهي حتقولك تتصرفي

كيف وادينى جتلك ياخالة أعمل إيه وأروح لمين! تعبانه يا خالة فيديني !

مسحت الخالة دموعها الحارقة وهدأت قليلاً من روعها وبدأت تسرد لها

الحل قائلة :

- بصي يابتي أبوكي قبل ما يموت قالى لو جتلك بتي صباح أديها الورقة

دي وقوليلها أنك متعلمة وتقدرى تنفيذها أنا خفت يابتي مقدرتش

أنفذها خفت عليكى لكن لو اتزنقتي إعملي المكتوب فيها .

ونهمضت تحضر لها تلك المخطوطة، التي كانت داخل إناء فخاري أ، أخذت

المخطوطة والورقة وشرعت في قراءتها، إذا هي مكتوبة بخط غريب يصعب

قراءته فالأحرف ليست عربية !

شردت لوهلة ثم التفت للعجوز.

- طب قالك حاجة تاني يا خالة!؟

العجوز:

- لا يابتي غير أنك تخلي بالك من نفسك عشان وهو بيأمني كان خايف ووشه مخطوف!

المرأة:

- طب قوليلي ياخاله، هو الشيخ اللي راح له أبويا زمان لساه عايش؟!
- أيوه يا بتي عايش روحيله يمكن يعرفك او يدلك علي اللي في الورق المخربط ده !

لم تتردد ولو للحظة، ذهبت في نفس الليلة وكلها أمل أن تصل لحل تلك الألغاز قبل أن يأتي الأفندية ويسألونها عن زوجها والساقية، لأنها تعلم جيداً تفكير مثل هذه العصابات ومدى قوتها !

ذهبت بمفردها لم تخش طريق القصب، وظلمته الموحشه وأصوات الذئاب ورهبتها، لم يكن يشغلها إلا الأخذ بالثأر لزوجها من تلك الأفعى، وحماية أطفالها من تكرار هذه الحادثة ومن الخطر الذي يهددهم من عصابة الآثار .

وما أن وصلت لدار الشيخ الذي يسكن عند أطراف القرية وبين زروع القصب، حتى طرقت الباب بقوة ونادت بصوت مرتفع:

- يا عم الشيخ يا عم الشيخ...

لم يستمر نداءها طويلاً إلا وقد فتح الباب، وإذا برجل عجوز بلامح غريبة ومخيفه، رجل ضخم الجسد لا يرتدي عمامة قراهم، له شعر طويل يشبه ليفه نخل، ولحية بيضاء كثيفة الشعر مجعدة، وحاجبان كأنهم شوارب غير منمقين! وأنف طويل مدبب! كلها ملامح مخيفة وكان الأغرب عيناه الثاقبتان باللون الأحمر الدموي، اهتزت في داخلها في البداية، لكنها استجمعت

قواها بسرعة متحذثة له:

- أنا صباح بت حمدان اللي جالك زمان عشان ساقية الدحلاب فاكركه؟!
الشيخ (وعكس ما توقعته من ملامحه الغريبه وشيخوخته، فهي كانت
تتوقع إما الماطله، أو المساومة، أو النسيان!):

- أيوه يابتي فاكركه ادخلي تعالي وحكيالك...

بصي يا بتي أبوكي زمان جالي وحكالي اللي حصل وكانت معاه ورقه
جلد مكتوبة بالفرعوني وأنا قتلته ساعتها أن الحارس هو اللي بيعمل
كدا وعندي إستعداد أخلصك منه بعد ما خدت الورقة الجلد ونزلت
مصر لواحد صاحبي كان معايا زمان في الجيش وهو يعرف ناس متعلمه،
وقدروا يعرفوني المكتوب في الورقة دي، قلت لأبوكي تعال ننفذها ونطلع
المقبرة دي وخذ إنت الذهب وإدينني المساخيط، لكن أبوكي رفض يا
بتي قالي عار علي ادخل حد يكشف حرمة بيتي، لكن أنا كتبتله ورقة
فيها الطريقة اللي تخلصه من الجن ده ويقدر بعدها ياخذ كل حاجه من
غير ضرر بس يا بتي أدي الحكاية .

- يعني الحل يا شيخ مكتوب في الورقة طب لو جبتها لك تفتكرها؟!

- أيوه يا بتي أنا عجزت صوح لكن مخي عال .

ارتسمت ابتسامة أمل على وجهها الشاحب، وقالت :

- طب الورقة أهى يا شيخ !

- تمام يابتي انتي دلوقت عايزه ايه؟! افسرها لك يعني؟!

- أيوه يامولاناو حياة أبوك يا شيخ الحقني، روعي أنا و عيالي معلقة في الورقة دي.

غادرت منزل الشيخ العجوز وهى تعرف يقينا نهاية هذا السر الغريب
ووضع حد لكل هذه المصاعب ملتحفة برداء الإصرار والعزيمة مدثرة كل
الأوجاع والأحزان بقبر زوجها!

وصلت منزلها مرهقه، بانتظار اللقاء الحاسم، متسلحة بعقلها وتعليمها
معتمدة على ربها بأن تنجح.

مر يومان منذ عودتها، وفي فجر اليوم الثالث، بدأ الباب يطرق طرقات
متلاحقة، ففتحت الباب علي وجه ذلك المهيّب (الباشا)،

الباشا:

- إذا سمحتي يا حاجه ممكن أتكلم معاكي.
- محدش معايا في البيت، لو عايز تتكلم اتكلم هنا.
- طيب الأول البقيه في حياتك وحياة أولادك في المرحوم
- متشكره، انت عايز ايه يا باشا
- أكيد المرحوم حكاك إحنا عايزين ايه !
- أيوه حكاالي، ووجها قد تحول للاحمرار من الغيظ
- طب كويس يلا بقي عشان تعرفي تربي عيالك وتقبوا علي وش الدنيا.
- بلهجة مستفزة !
- بص يا باشا، احنا ممنخافش، ولا معنتهدد، بس أنا حقولك عشان تعبت
من سلسال الدم ده .
- يبقي متفقين، ايه طلباتك؟!

- هما طلبين يا باشا مش أكثر، عقد بملكيتكم للبيت، واتنين مليون جنيه، وبعدها حاخذ عيالي وأسيب البلد بحالها.
- طلباتك موجودة، ولوح بإصبعه لأحد أفراد الحراسه فأتاه بحقيبة، أخرج منها الباشا عقد، إحنا عاملين حسابنا لكل حاجه يا حاجه، وكمان الشنطة فيها ثلاثه مليون مش إثنين.
- تمام يا باشا كدا أقدر أخذ عيالي وأمشي.
- ممكن تورينا المكان الاول يا حاجه.
- اتفضلوا.

أخذتهم للحوش وأشارت لهم علي الساقية.

فأوماً الباشا لأحد رجاله ليتأكد أنه هو المكان المطلوب، فنزل أحدهم ودخل الفتحة فوجد نص فرعوني أول جدار السرداب وصور لبعض الآلهه وسلم، ثم خرج، مشيراً للباشا بعلامة النصر قائلاً:

- كله تمام ياباشا.

الباشا:

- تمام يا حاجه، يلا يارجاله بالليل نيجي نخلص.

وغادرت القرية متجهة لأحد المحافظات الساحلية لتقابل هناك زميلها في الجامعة وحبها القديم وأمنيتها الأولى "سيد".

وصلت لتجده بانتظارها، واستقلا السيارة لتبدأ الحديث معه:

- عايزة مكان أسكن فيه انا وعيالي بس يكون فيه مطرح تحت الأرض ويكون أمان.

- بس ده حيكون غالي يا صباح!!
- ملكش دعوة اتصرف والفلوس جاهزة.
- طيب إيه رايك أنا كنت مشطب شقة اتجوز فيها ايه رأيك تقعدوا فيها لحد ما أشوفلكم المكان اللي انتي عايزاه !!
- ماشي المهم يكون أمان وبعيد عن الزحمة.
- دا مكان حيعجبك قوي.

وصلوا واستقرت هي وأولادها، واطمأنت على كل أغراضها.

بينما هو بدأ ينفذ صبره وكاد عقله ينفجر من كثرة الأسئلة المتزاخمة.

- يا صباح متفهمني عقلي حيفرمني يا شيخه خبر إيه اومال ايه الحكاية!
- رسمت صباح ابتسامه خفيفة علي أعتاب شفيتها الجافتين، ثم اتكأت على كرسي متأوهة:

- حقولك على كل حاجه.

وبدأت تقص عليه حتى وصلت في الأحداث لحوارها مع الشيخ..

- ولما مشيت من عند الشيخ كنت متأكدة إنني أقدر انتقم من الجن بعد ما عرفت من الشيخ إن الحارس هو اللي بيستغل حيات الحوش ويخليهم ينهشوا أي حد يقرب لأن المخطوطة معناها «الموت لكل من يزعم الملك» والحارس بتاعها عم يظهر في صورة حية، قرئت سور القرآن اللي قال لي عليهم وكان مفهمني إن الحارس بقي ضعيف بعد ما محمد قدر يطلع بالتلت تحت وفعلا كان الخوف ملهوش مكان جنب التار، واتوضيت وقرئت القرآن وبعدها سمعت صرخة كانت حتخرم ودني،

بعدها أخذت التلت حنت وروحت للشيخ وحكىته اللي حصل قالي
كدا تمام انت كدا حرقتي الحارس الجنى، فرحت قوي إني أخذت تار
جوزي من الجن.

وقلت للشيخ عايزه أبيع دول، ومفيش كام ساعه كان جايب لي شنطة
سفر مليانه دولارات، وقالي يابتي انت كدا ملكيش قعاد في البلد، قتلته لا
يا شيخ لسه تاري مع الأفنديه دا هم السبب في موت جوزي . واتفقت معاه
إني حرجعله وأخذ الشنطة، وبعد ما خلصت مع الأفندية، رجعتله وقلته بعد
ما أمشي إبعث مرسال لمحمد بيه ظابط النقطة هو عارف كل حاجه، لأنني
كنت روحته وحكتله من غير ما أجيب سيرة عن التلت حنت وإتفقت معاه
ميجبش سيرتي في أي حاجه وطبعاً بالعقد اللي حيلقوه معاهم وشهرته في
القبض علي العصابات وافق.

بس يا سيد وقبل ما أقعد معاك جالي المرسال إن اتقبض عليهم كلهم .
والحمد لله، نام وارتاح في قبرك يا محمد؛ قدرت أخذ تارك من الإنس
والجن .

تمت بحمد الله .